

Cultura di Aruba a perde un baluarte di e mundo di literatura

Sr. Mario Dijkhoff

ORANJESTAD (AAN): Dialuna anochi Ministerio di Cultura a haya e tristo noticia cu un baluarte di Aruba su Cultura den e

mundo di literatura, Sr. Mario Dijkhoff a fayece na un edad di 64 aña.

Sr. Mario Dijkhoff tabata un persona hopi conoci

den seno cultural di Aruba, unda cu como linguista y un persona cu ta stima Papiamento a skirbi varios buki y dicionario na Papiamento.

Na inicio di su trayectoria como linguista Mario Dijkhoff a drenta servicio di Gobierno di Aruba unda cu el a aporta tanto na Instituto di Cultura como tambe na Departamento di Enseñansa. El a traha incansablemente tanto pafor y paden di enseñansa pa su idioma Papiamento.

Como linguista Mario Dijkhoff a traha den diferente seccion y comisionan, manera Instituto di Lengua di Aruba, grupo di trabao di ortografia, grupo di trabao di gramatica. Su especialisacion tabata den fonetica y fonologia, unda el a hunga un rol hopi importante den e comision di ortografia di Papiamento na Aruba.

Su contribucion na e aceptacion y conservacion di Papiamento tabata uno grandi camida cu el a lanta un fundacion independiente yama 'Papiando Papiamento' pa duna informacion den corant, na radio y television, unda el a duna charla y a organiza cursonan di gramatica y ortografia di Papiamento.

Banda di su curriculum hopi activo den e mundo linguista, Mario Dijkhoff a dedica su mes na skirbi bukinan na su idioma tan stima Papiamento, caminda el a publica diferente buki y a contribui tambe na diferente otro publicacionnan di tanto buki como redaccion di tur sorto di texto cu mester a worde publica.

Ministerio di Cultura ta expresa palabranan di condolencia na e yiunan, famia, amigonan, comunidad Boneriano y henter Aruba cu fayecimento di Sr. Mario Dijkhoff. Cu Mario sosega na paz.

